

Молебное пение прпп. Кириллу и Марие, Радонежским чудотворцам

Диакон: Благослови, Владыка!

Священник: Благословен Бог наш всегда, ныне и присно, и во веки веков.

Чтец: Аминь. Царю Небесный:

Таже чтец: Трисвятое. Пресвятая Троице: Отче наш: **Возглас:** Яко Твое есть Царство: **Чтец:** Аминь. Господи, помилуй, 12. Слава, и ныне: Приидите, поклонимся: трижды.

Псалом 142

Господи, услыши молитву мою, внуши моление мое во истине Твоей, услыши мя в правде Твоей и не вниди в суд с рабом Твоим, яко не оправдится пред Тобою всяк живой. Яко погна враг душу мою, смирил есть в землю живот мой, посадил мя есть в темных, яко мертвыя века. И уны во мне дух мой, во мне смятеся сердце мое. Помянух дни древния, поучихся во всех делех Твоих, в творениих руку Твоею поучахся. Воздох к Тебе руке мои, душа моя, яко земля безводная Тебе. Скоро услыши мя, Господи, исчезе дух мой, не отврати лица Твоего от мене, и уподоблюся низходящим в ров. Слышану сотвори мне заутра милость Твою, яко на Тя уповах. Скажи мне, Господи, путь воньже пойду, яко к Тебе взях душу мою. Изми мя от враг моих, Господи, к Тебе прибегах. Научи мя творити волю Твою, яко Ты еси Бог мой. Дух Твой благий наставит мя на землю праву. Имене Твоего ради, Господи, живиши мя, правдою Твоею изведеши от печали душу мою. И милостию Твоею потребиши враги моя и погубиши вся стужающыя души моей, яко аз раб Твой есмь.

Слава, и ныне: Аллилуиа, трижды.

Таже ектенія:

Міром Гóсподу помóлимся.

Лик: Гóсподи, помíлуй.

О свѣшнем міре и спасѣнии душ нáших, Гóсподу помóлимся.

Лик: Гóсподи, помíлуй.

О міре всего міра, благостояннии святѣх Бóжиих церквѣй и соединѣнии всех, Гóсподу помóлимся.

Лик: Гóсподи, помíлуй.

О святем храме сем и с верою, благоговением и страхом Божиим входящих в онь, Господу помолимся.

Лик: Господи, помилуй.

О Великом Господине и отце нашем, Святейшем Патриархе Кирилле, честнем пресвитерстве, во Христе диаконстве, о всем причте и людех, Господу помолимся.

Лик: Господи, помилуй.

О Богохранимей стране нашей, властех и воинстве ея, Господу помолимся.

Лик: Господи, помилуй.

О граде сем, всяком граде, стране, и верою живущих в них, Господу помолимся.

Лик: Господи, помилуй.

О благорастворении воздушов, о изобилии плодов земных, и временех мирных, Господу помолимся.

Лик: Господи, помилуй.

О плавающих, путешествующих, недугующих, страждущих, плененных и о спасении их, Господу помолимся.

Лик: Господи, помилуй.

О еже очистить нас от грехов и беззаконий наших, иссушающих в нас, еже к Нему и к искреннему любовь, водрузити же ю силою, действием, и благодатию Пресвятаго Своего Духа, и вкоренити в сердца всех нас, прилежно Господу помолимся.

Лик: Господи, помилуй.

О еже всеяти, и вкоренити благодатию Пресвятаго Своего Духа новую Своего Новаго завета заповедь, еже любити друг друга, и не себе угождати, но еже к славе Его, и созиданию искреннего всегда искати, Господу помолимся.

Лик: Господи, помилуй.

О еже искоренити в нас ненависти, зависти же и рвеня, и все прочыя страсти, братолюбие разрушающыя, и нелицемерную любовь всеяти, усердно Господу помолимся.

Лик: Господи, помилуй.

О еже теплую любовь к Богу и к искреннему в нас, благодатию Пресвятаго Своего Духа распалити, и тою все страсти душ и телес наших искорене сожещи, Господу помолимся.

Лик: Господи, помилуй.

О еже искоренити в нас страсть самолюбия, братолюбие же добродетель силою Пресвятаго Своего Духа вкоренити, сердцем сокрушенным Господу помолимся.

Лик: Гóсподи, помíлуй.

О еже не любити нам мира, и яже в мире, но истинною любовию Бога, и славу Его, и искреннего пользу и спасение возлюбити, и яже на небеси уготованная благая присно зрети, и сих искати вседушно, Господу помолимся.

Лик: Гóсподи, помíлуй.

О еже не точию други и братию нашу, но и враги наша истинно любити, и ненавидящим нас благотворити, силою, действием, и благодатию Пресвятаго Своего Духа принудити нас, Господу помолимся.

Лик: Гóсподи, помíлуй.

О еже себе внимати, себе окаявати, и свои согрешения всегда зрети, себе пред Богом, и пред всеми смиряти, ближнего николиже осуждати, но яко самого себе того любити, силою, действием, и благодатию Пресвятаго Своего Духа, Господу помолимся.

Лик: Гóсподи, помíлуй.

О еже поревновати нам древних христиан к Богу и к искреннему горячей любви, и наследником, и преемником тех быти, не образом точию, но детельною истиною, силою, действием, и благодатию Пресвятаго Духа, Господу помолимся.

Лик: Гóсподи, помíлуй.

О еже в правоверии непозыблемых, в мире и союзе любви горящих, и во всех добродетелях преспевающих нас всегда сохранить, и от всех душестных страстей невредимых, силою, действием, и Пресвятаго Духа соблюсти, Господу помолимся.

Лик: Гóсподи, помíлуй.

О избáвиться нам от вся́кия скóрби, гнѣва и нúжды, Гóсподу помóлимся.

Лик: Гóсподи, помíлуй.

Заступí, спасí, помíлуй и сохрани́ нас, Бóже, Твоёю благодáтию.

Лик: Гóсподи, помíлуй.

Пресвяту́ю, Пречíстую, Преблагословѣнную, Слáвную Влады́чицу на́шу Богороди́цу и Присноде́ву Мари́ю со все́ми святы́ми помяну́вше, са́ми себѣ и друг дру́га, и весь живóт наш Христу́ Бóгу преда́дим.

Лик: Тебѣ, Гóсподи.

Возглас:

Яко подобает Тебе всякая слава, честь и поклонение, Отцу, и Сыну, и Святому Духу, ныне и присно, и во веки веков.

Лик: Амѣнь.

Бог Господь и явися нам, благословен Грядый во имя Господне.

Стих: Исповедаетеся Господеви, яко благ, яко в век милость Его.

Стих: Обышедше обыдоша мя и именем Господним противляхся им.

Стих: Не умру, но жив буду и повею дела Господня.

Стих: Камень, Егоже небрегоша зиждущии, Сей бысть во главу угла, от Господа бысть Сей и есть дивен во очесех наших.

Поется же Бог Господь: **четырежды.**

И настоящий тропарь, глас 3-й:

Блаженств Христовых причастницы, / честнаго супружества и попечения о чадех добрый образе, / праведнии Кирилле и Марие, / плод благочестия, Сергия преподобнаго, нам явившии, / с нимже усердно молитесь Господа / низпослати нам дух любви и смиренномудрия, / да в мире и единомыслии // прославим Троицу Единосущную.

Слава, и ныне: Богородичен, глас 3.

Красоте девства Твоего и пресветлой чистоте Твоей / Гавриил удивися, вопияше Ти, Богородице: / кую Ти похвалу принесу достойную? / Что же возыменую Тя? / Не доумеваю и ужасаюся. / Темже яко повелен бых, вопию Ти: / радуйся, Благодатная.

Акафист преподобным Кириллу и Марии Радонежским, родителям преподобного Сергия

Кондак 1

Избрании чудотворцы и предивнии угодницы Господни, / Сергия великаго Церкви Российской даровавшии, / преподобнии Кирилле и Марие, / обители Хотьковския заступницы! / Пение похвальное вам приносяще, молим вы усердно: / яко имущии дерзновение ко Господу, / предстательством вашим от всяких бед нас свободите / и наследники Царствия Небеснаго соделайте, да зовем вси радостно: /

Радуйтесь, преподобнии Кирилле и Марие, / усерднии о нас пред Богом молитвенницы.

Икос 1

Ангели земнии и человецы небеснии воистину явитесь, преподобнии Кирилле и Марие, от юности ваша чистую совесть пред Богом имущии, и добре во благочестии вкупе пожившии. Мы же, таковое богоугодное житие ваше прославляюще, гласы хвалебными взываем сице:

Радуйтесь, от юности ваша Христа возлюбившии и Тому единому поработавшии;

радуйтесь, целомудрия хранителие и душевныя и телесныя чистоты рачителие.

Радуйтесь, души и тела ваша в обителище Духа Святаго уготовившии;
радуйтесь, исполненнии премудрости и разума Божественнаго.

Радуйтесь, яко от земли на небо преидосте и тамо со ангелы Троице предстоите;

радуйтесь, яко со бесплотными лики Трисвятую песнь Ей воспеваете.

Радуйтесь, на небеси и на земли от Господа прославленнии;

радуйтесь, обретшии место вечнаго всесветлаго упокоения.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 2

Видя Отец светов богоугодное житие ваше, благоволи избрати вас, блаженнии, да явите миру светильник пресветлый - Сергия преподобнаго, в немже и ваши имена прославляются и вси вернии воспевают Господу: Аллилуиа.

Икос 2

Разумом Божественным просвещеннии, Кирилле и Марие, непрестанно поучаста чада своя в послушании и кротости. Умудрите убо и нас, преподобнии, заповедем Господним следовати неложно, да обрящем, якоже и вы, спасение вечное и принесем вам благохваления таковая:

Радуйтесь, блаженнии, в боголюбии пожившии и благоверие сохранишии;

радуйтесь, милости и сострадания преисполнении.

Радуйтесь, милостынею и молитвами Небесное Царствие стяжавшии;

радуйтесь, смирением и пощением вечное блаженство улучившии.

Радуйтесь, яко мзда ваша многа на Небесех есть;

радуйтесь, яко молитвами вашими и мы надежды Царствия Христова не лишаемся.

Радуйтесь, яко радость ваша вечна во светлостех святых;

радуйтесь, яко тояжде радости вашим предстательством и мы сподобляемся.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 3

Силою Божиею ограждаемь, преподобный Кирилл князю Ростовскому со всяким усердием служа, вкупе с ним во орду Агарянскую, мира ради, хождаше, да людие Российстии ослабу от ига нечестивых имут и Богу непрестанно поют: Аллилуиа.

Икос 3

Имуще помышление и удивльшеся молящиися в церкви людие о трикратном во чреве Мариином плода глашении, разумеша нечто преславное и чудное быти: и по сих уведевше радостное сына рождение, радовахуся. С ними же и мы радостная вам, преподобнии, приносим, глаголюще:

Радуйтесь, двоице святая, Богом благословенная;

радуйтесь, звезды пресветлии, богоугодный путь супружескаго жития верно указующии.

Радуйтесь, родители блазии добраго и избраннаго плода;

радуйтесь, благодати Божия исполнении.

Радуйтесь, супругов в Православной вере и благочестии наставляющих;

радуйтесь, богобоязненному воспитанию чад нас научающих.

Радуйтесь, целомудрия супружескаго образи преизящнии;

радуйтесь, хотящих богоугодно жити изряднии учителяе.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 4

Буря скорбей и напастей житейских не ослаби крепкия любве ваша к Богу, Кирилле и Марие, блаженнии, но паче научи вас изряднее отражати разженные стрелы лукаваго. Научите убо и нас вся скорби мира сего с кротостию претерпевати, поюще Богу: Аллилуиа.

Икос 4

Слышавше Варфоломея, грамоте неискусна, чтуща же богодохновенныя писмены, удивишася зело, блаженнии, благодарение Богу принесоша, премудрость отроку чрез Ангела даровавшему, егоже в дом свой, яко старца-схимника прияша, заповедь апостола Павла соблюдающе: страннлюбия не забываюте. Мы же, таковую благодать Божию вам явленную ведяще, вопием сице:

Радуйтесь, заповедей Христовых вернии исполнителие;
радуйтесь, учения Евангельскаго истиннии последователие.
Радуйтесь, угодницы и друзи Божии;
радуйтесь, странноприимства древняго праотца Авраама подражателие.
Радуйтесь, светом благочестиваго жития вашего просиявшии;
радуйтесь, любовь и милосердие к нищим и сирым явившии.
Радуйтесь, беспомощным скории помощницы;
радуйтесь, яко и нам присно помогаете и к Небесному Отечеству руководствуете.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 5

Богоотечным звездам подобни бысте, преблаженнии Кирилле и Марие, егда, пришедше от страны Ростовския в пределы княжества Московского, во граде Радонеже вселитесь и тамо сущих людей благочестием своим удивисте, подвизающе тех пети: Аллилуиа.

Икос 5

Видевше, святии, тщание сына вашего Варфоломея к иноческому житию, моляху его, да пребудет с вами до кончины вашей. Он же, яко сын послушания, издетска наученный вами заповеди Господни исполняти, покорися воле вашей, якоже Божией, Кирилле и Марие, научая всех воспевати тако:

Радуйтесь, блаженств Христовых причастницы;

радуйтесь, честнаго супружества и попечения о чадах истиннии образи.

Радуйтесь, ангелонравнии человецы;

радуйтесь, преподобных и праведных сопричастницы.

Радуйтесь, Пресвятыя Троицы вернии служителие;

радуйтесь, яко и чад ваших почитати Ю научившии.

Радуйтесь, яко сын ваш Триипостасному Божеству обитель дивную устрои;

радуйтесь, яко сего ради и ваша святая имена прославлена суть по всей Руси.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 6

Проповедницы веры Православныя и ревнителие благочестия не словом токмо, но и житием вашим бысте во граде Радонеже, прехвальнии Кирилле и Марие. Темже и Святая Церковь достойно почитает вас, немолчно воспевая дивному во святых своих Богу: Аллилуиа.

Икос 6

Возсия яко свет благочестивое в болярстве житие ваше, преблаженнии Кирилле и Марие, егда же достигше возраста преклонна, образ иноческий на ся восприяли есте во обители Хотьковстей, вышшее нам смирение показующе. Темже с любовию вопием вам таковая:

Радуйтесь, любви ради Господа славу мира сего оставльшии;

радуйтесь, славу Божию возлюбившии;

Радуйтесь, во обитель древнюю пришедшии и тамо покой себе обретшии;

радуйтесь, святую схиму в броню спасения восприявшии.

Радуйтесь, Покрову Богородицы души своя вверившии;

радуйтесь, образ Ангельский восприимшии.

Радуйтесь, всем иноком и инокинем доброе правило;

радуйтесь, прежде кончины ваша блаженства от Бога удостоившись.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 7

Хотя Человеколюбец Господь явити в житии вашем, преподобнии Кирилле и Марие, образ назидания, не токмо людем мирским, но и иноческому лику, внуши вам в старости маститей оставити всякое попечение земное и воспрियाти образ ангельский, яко венец нетления, во еже воспевати Триединому Богу Серафимскую песнь: Аллилуиа.

Кондак 7

Новую благодать показа всех Творец и владыка чрез вас, преподобнии, егда прешли есте от временныя сия юдоли плачевныя во обители вечныя. Святыя бо мощи ваша аще и под спудом сокровенны, чудеса источаху: многим болящим, наипаче же приносимым к вам младенцам исцеления подаваху. Сего ради приимите, врачеве наши блаженнии, от нас похвалы сицевая:

Радуйтесь, смертию временною пришедшии к жизни вечней;

радуйтесь, от Господа нетлением и чудесы прославленнии.

Радуйтесь, яко память ваша с похвалами и успение со святыми;

радуйтесь, яко имена ваша написана на Небесех и благословенна во Отечестве вашем.

Радуйтесь, болящим младенцем исцеление подающими;

радуйтесь, болящую девицу, с верою и любовию к вам притекшую, от недуга тяжкаго избавившии.

Радуйтесь, о любящих и чтущих вас небеснии предстателие;

радуйтесь, от Господа дары благодати Его нам присноподающими.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 8

Страшное и ужасное бедствие прииде на землю Московскую егда язвою моровою уязвлены быша людие мнози во градех и весех и умроша. Тогда собор освященный со инокини Хотьковския обители молебная пения вам приношаху

и предстательством вашим избавление от смертоносных беды получиша, вопиюще благодеющему чрез вас Богу: Аллилуиа.

Икос 8

Вси боголюбцы скорбию велиею объята быша, егда во дни гонений и лихолетий, на землю Российскую нашедших, обитель Покрова Пречитыя Девы в Хотькове разорению и запустению богоборцы предаша. Память же ваша, преподобнии, в благочестивых людех незабвена бысть и прославляема сице:

Радуйтесь, чудотворцы наши предивнии;

Радуйтесь, града Хотькова ограждение.

Радуйтесь, обители вашае хранителие;

Радуйтесь, земли Радонежския покровителие.

Радуйтесь, на враги видимыя и невидимыя крепции споборницы;

радуйтесь, благодеяний множество источающии.

Радуйтесь, состраданием вашим всех объемлющии;

радуйтесь, всем нам приснии ходатаи спасения.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 9

Вся Церковь Божия радовашеся, егда обитель ваша, преподобнии Кирилле и Марие, возсоздася и мощи ваша честныя, от лет древних Богом хранимыя, обретены и в храме соборнем положены быша. Сего ради людие к вам в напастех прибегают и помощь от вас получают, благодарне вопиюще Богу: Аллилуиа.

Икос 9

Витийство человеческое не довлеет к достойному прославлению чудес от мощей ваших и ныне совершающихся, преблаженнии Кирилле и Марие. Некая монахиня старица немощная, костное сокрушение имевшая и от врачей исцеление не обретшая, к вам, преподобнии, притекши, со слезами моляшеся. Здравие же получивши, во умилении сердца воспеваше вам:

Радуйтесь, благодати Святаго Духа сосуди избраннии,

радуйтесь, радости нам вечныя благоприятнии ходатаи.

Радуйтесь, немощных от недугов скоро исцеляющие;
радуйтесь, благодатными исцеления изрядных врачей удивляющие.
Радуйтесь, нетленнии благоухающие цветы;
радуйтесь, к бессмертию указующии лучи.
Радуйтесь, на земли величием чудес блистающие;
радуйтесь, на небеси со Ангелы Бога славящие.
Радуйтесь, преподобнии Кирилле и Марие, усерднии о нас пред Богом
молитвенницы.

Кондак 10

Спасение вечное наследовавше, богоблаженнии Кирилле и Марие,
душами вашими во обителях горних неразлучно в Бозе пребываете, честными
же мощами вашими во обители Пресвятыя Девы нетленно вкупе поживаете и
обильная исцеления источаете, нас же в Горний Иерусалим оный
руководствуете, вопиющих Богу: Аллилуиа.

Икос 10

Стена и прибежище вы есте, преподобнии, всем к вам притекающим,
ихже вы от искушений и соблазнов мира сего сохраняете, во обители же вашей
живущих монашескому деланию научаете. Сего ради вам сиеца
благодарственная словеса приносим:

Радуйтесь, руководствующии нас ко спасению;
радуйтесь, наставляющие шествовати по заповедем Господним.
Радуйтесь, научающие терпеливо нести крест свой;
радуйтесь, яко вашими молитвами невредимы от бесов и человек злых
пребываем.

Радуйтесь, яко вы есте ходатаи о святей обители вашей;
Радуйтесь, яко Богом собранным сестрам в ней вы есте помощницы.
Радуйтесь, чадолюбивии наши заступницы;
радуйтесь, яко с преподобным Сергием престолу Божию предстоите.
Радуйтесь, преподобнии Кирилле и Марие, усерднии о нас пред Богом
молитвенницы.

Кондак 11

Пение молебное приносят вам, преблаженнии Кирилле и Марие, не во обители Хотьковстей токмо живущии, но и вси, чтущии сына вашего, преподобнаго Сергия. Прежде нежели поклонитися честным мощем его, по завету древнему, вам благодарение возносят: честь бо сына на родители преходит. Сего ради мы, прославляюще род праведных, поем Богу: Аллилуиа.

Икос 11

Светом трисиянным осияваеми, всеблаженнии Кирилле и Марие, со всеми святыми предстоите ныне Небесному Царю и яко светила светозарная, присно просвещаете души притекающих к раце мощей ваших, сего ради, прославляюще вас, глаголем:

Радуйтесь, яко скончали есте жизнь свою телом, и духом же не отступаете от нас;

радуйтесь, с верою приходящих к раце мощей ваших благодатно освящающих.

Радуйтесь, бисери сияющих и благодатно люди просвещающих;

радуйтесь, свети умнии, зарею Святаго Духа облистающих.

Радуйтесь, умиловителние известнии Царя Небеснаго;

радуйтесь, услышателние скории призывающих молитвенно честная имена ваша.

Радуйтесь, помощницы дивнии, упование на вас по Бозе возлагающих;

радуйтесь, всем православным всякое прошение во их пользу исполняющих.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 12

Благодать от Бога вам данную ведяще, прилежно молим вы ныне, прехвальнии схимонаси: пролейте теплую о нас молитву ко Господу, да сохранит Отечество ваше неврежденно от напастей и нестроений, и нас да помилует и спасет, вопиющих Ему: Аллилуиа.

Икос 12

Поюще ваше Богоугодное житие, преподобнии, и на небесех от Бога прославление, ублажаем праведное преставление ваше, величаем чудеса, от святых мощей ваших истекающая, и на неусыпныя молитвы ваша уповающе, взываем вам сицевая:

Радуйтесь, житие ваше земное благочестне скончавшии;

радуйтесь, от Царя Небеснаго венцы славы приимшии.

Радуйтесь, облеченнии в ризу благодатнаго нетления;

радуйтесь, во благоухании святыни нетленно почивающии.

Радуйтесь, препоясанныи силою многих чудес;

радуйтесь, яко честныя мощи ваша врачевница явишася недугом человеческим.

Радуйтесь, яко от них всяк, с верою приходяй, дары целебныя приемлет;

радуйтесь, яко обитель ваша по всей земли россиястей прославляется.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 13

О преславнии чудотворцы и угодницы Господни, преподобнии Кирилле и Марие! Примите сия моления наша от всея души вам ныне возносимыя и сподобите нас предстательством вашим достигнути Небеснаго Царствия, идеже Ангели и вси святии воспевают непрестанными гласы хвалу Пресвятей Троице: Аллилуиа, Аллилуиа, Аллилуиа.

(сей кондак трижды)

Икос 1

Ангели земнии и человецы небеснии воистину явитесь, преподобнии Кирилле и Марие, от юности ваша чистую совесть пред Богом имущии, и добре во благочестии вкупе пожившии. Мы же, таковое богоугодное житие ваше прославляюще, гласы хвалебными взываем сице:

Радуйтесь, от юности ваша Христа возлюбившии и Тому единому поработавшии;

радуйтесь, целомудрия хранителие и душевныя и телесныя чистоты рачителие.

Радуйтесь, души и телеса ваша в обителище Духа Святаго уготовившии;

радуйтесь, исполненнии премудрости и разума Божественнаго.

Радуйтесь, яко от земли на небо преидосте и тамо со ангелы Троице предстоите;

радуйтесь, яко со бесплотными лики Трисвятую песнь Ей воспеваете.

Радуйтесь, на небеси и на земли от Господа прославленнии;

радуйтесь, обретшии место вечнаго всесветлаго упокоения.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 1

Избрании чудотворцы и предивнии угодницы Господни, / Сергия великаго Церкви Российстей даровавшии, / преподобнии Кирилле и Марие, / обители Хотьковския заступницы! / Пение похвальное вам приносяще, молим вы усердно: / яко имущии дерзновение ко Господу, / предстательством вашим от всяких бед нас свободите / и наследники Царствия Небеснаго соделайте, да зовем вси радостно: /

Радуйтесь, преподобнии Кирилле и Марие, / усерднии о нас пред Богом молитвенницы.

Прокимен, глас 7:

Возлюблю Тя Господи, крепосте моя, Господь утверждение мое.

Стих: Бог мой, помощник мой, и уповаю на Него.

К Коринфянам послание Святаго Апостола Павла чтение.

[Зач. 154.] 1 Кор. 13:4-8

Братие, вы есте тело Христово и уди от части. И овы убо положи Бог в Церкви, первее апостолы, второе пророки, третие учителя; потом же силы, таже

дарования исцелений, заступления, правления, роди языков. Еда вси апостоли? Еда вси пророцы? Еда вси учителя? Еда вси силы? Еда вси дарования имут исцелений? Еда вси языки глаголют? Еда вси сказуют? Ревнуйте же дарований больших; и еще по превосхождению путь вам показую. Аще языки человеческими глаголю и ангельскими, любве же не имам, бых яко медь звенящи, или кимвал звяцай. И аще имам пророчество и вем тайны вся, и весь разум, и аще имам всю веру, яко и горы преставляти, любве же не имам, ничтоже есмь. И аще раздам вся имения моя, и аще предам тело мое, во еже сожещи е, любве же не имам, ни кая польза ми есть. Любы долготерпит, милосердствует, любы не завидит, любы не превозносится, не гордится, ни безчинствует, не ищет своя си, не раздражается, не мыслит зла, не радуется о неправде, радуется же о истине; вся любит, всему веру емлет, вся уповает, вся терпит. Любы николиже отпадает.

Аллилуиа, глас 8:

Стих : Возлюбите Господа вси преподобнеи Его:

Стих : Яко истины взыскает Господь:

Евангелие от Матфея, зачало 78. Мф 19:3–12

Во время оно, приступиша ко Иисусу фарисее искушающе Его и глаголаша Ему: аще достоин человеку пустити жену свою по всяцей вине? Он же отвецав рече им: несте ли чли, яко Сотворивый искони, мужеский пол и женский сотворил я есть? И рече: сего ради оставит человек отца своего и мать и прилепится к жене своей, и будета оба в плоть едину, якоже ктому неста два, но плоть едина. Еже убо Бог сочета, человек да не разлучает. Глаголаша Ему: что убо Моисей заповеда дати книгу распустную и отпустити ю? Глагола им: яко Моисей по жестосердию вашему повеле вам пустити жены ваша, изначала же не бысть тако. Глаголю же вам, яко иже аще пустит жену свою, разве словесе прелюбодейна, и оженится иною, прелюбы творит, и женяйся пущеницею прелюбы деет. Глаголаша Ему ученицы Его: аще тако есть вина человеку с женою, лучше есть не жениться. Он же рече им: не вси вмещают словесе сего, но имже дано есть. Суть бо скопцы, иже из чрева матерня родишася тако, и суть скопцы, иже скопишася от человек, и суть скопцы, иже исказиша сами себе Царствия ради Небеснаго. Могий вместити да вместит.

Сугубая ектения:

Помілуй нас, Бо́же, по вели́цей мі́лости Тво́ей, мо́лим Ти ся, услы́ши, и помілуй.

Лик: Го́споди, помілуй, **трижды.**

Ещё мо́лимся о Вели́ком Госпо́дине и отце́ на́шем, Святе́йшем Патри́архе Кирилле, и о всей во Христе́ бра́тии на́шей.

Лик: Го́споди, помілуй, **трижды.**

Ещё мо́лимся о Богохрани́мей стране́ на́шей, власте́х и во́инстве ея́, да тихое и безмо́лвное жити́е поживе́м во вся́ком благоче́стии и чистоте́.

Лик: Го́споди, помілуй, **трижды.**

Еще молимся да хранят люди Твои заповедь сию: еже Бог сочета, человек да не разлучает, и даруется домашним их церквам несокрушимая крепость и преспеяние в любви нелицемерней;

Лик: Го́споди, помілуй, **трижды.**

Еще молимся о сохранении супружества рабов Твоих в мире и единомыслии, благочестии и чистоте;

Лик: Го́споди, помілуй, **трижды.**

Еще молимся да возвеселятся люди твои видением сынов и дочерей, и да умножится народ наш и благословение Твое наследуется в нем в род и род.

Лик: Го́споди, помілуй, **трижды.**

Ещё мо́лимся о ми́лости, жи́зни, ми́ре, здра́вии, спасе́нии, посе́щении, прощ́ении и оставле́нии грехо́в рабо́в Бо́жих, бра́тии свята́го хра́ма сегó.

Возглас:

Услыши ны Боже Спасителю Наш, упование всех концов земли, и сущих в море далече, милостив, милостив буди, Владыко, о гресех наших, и помилуй ны: милостив бо и человеколюбец Бог еси, и Тебе славу воссылаем, Отцу и Сыну и Святому Духу, ныне и присно и во веки веков.

Лик: Аминь.

Молитва прпп. Кириллу и Марии Радонежским.

О блаженная двоице, воистину земли русския украшение, святии преподобнии Кирилле и Марие, иже во святых отца нашего Сергия родители! Образ брака христианскаго яви Господь преславное житие ваше; славно бо пожили есте в лета тяжкия для земли и народа нашего и вся скорби и

искушения мира сего претрели есте единою плотию - сего ради прослави Господь вас и супружество ваше.

Сего ради к вам прибегаем и молимся со усердием крепким: принесите за нас, грешных, святая молитвы ваша ко Господу Богу, и испросите нам вся благопотребная душам и телесем нашим: веру праву, надежду благу, любовь нелицемерну, благочестие непоколебимое, в добрых делах преуспеяние, наипаче же союзом брачным сочетавающимся или сочетатися союзом брачным хотящим даруйте молитвами вашими целомудрие, друг ко другу верность и любовь в союзе мира, единомыслие душ и телес, пребывание незазорное, дома исполнены благостыни и в жизни вечней неувыдаемый венец славы Небесная.

Ей, чудотворцы святии! Не презрите молитв наших, со умилением вам возносимых, но будьте приснии заступницы наши пред Господем и сподобите нас предстательством вашим спасение вечное получитьи и Царствие Небесное наследовати, да славословим неизреченное человеколюбие Отца и Сына и Святаго Духа, в Троице покланяемаго Бога, во веки веков. Аминь.

Лик: Аминь.

Диакон: Премудрость.

Священник: Пресвятая Богородица спаси нас

Лик: Честнейшую Херувим:

Священник: Слава Тебе, Христе Боже, упование наше, слава Тебе

Лик: Слава и ныне: Благослови.

Священник: Отпуст.